

四庫全書

集部

欽定四庫全書

集部

陵川集卷二十九

三十

詳校官中書

臣孫溶

主事臣呂雲棟覆勘

總校官編修

臣

王燕緒

校對官編修

臣

汪鏞

謄錄監生

臣

陳韶

欽定四庫全書

陵川集卷二十九

元 郝經 撰

序

甲子集序

中統五年歲舍甲子秋七月有星孛於東方經時猶在
宋之儀真館仰而嘆曰我生之初是星沒焉金源氏滅
而為本朝今四十有二年矣星復出焉而越在他國其

能久於此乎遂束載警備於行橐中得弟彞庸軍史趙
文享書狀官苟宗道等所錄雜藻數帙惕焉有感於中
因自誦曰何茲生不辰之甚乎夫學所以為道非志於
文而已也德業積於內行實加於人而文章以為華爾
如景星慶雲日芒月采瑞太平光天下黼黻一世者也
今乃梗踣蹢躅自南而北自北而南蹂藉穢亂纏結氛
祲鬚髮野變形體道敝無一日之晏功業不建道德日
愧而徒區區於文字之末混淆於血肉之極輾轉於彗

李之變入於罟獲陷穽而莫之出可為哀已豈天嗇於
彼祇令就於此乎遂畀宗道令整頓綴緝其詩傳春秋
集傳外傳原古錄通鑑書法三國條例等各自為一書
其諸史文雜著則類別為編為詩賦論說辨解書傳志
箴銘贊頌序記碑誌行狀哀辭祭文雜著錄宏辭表奏
使宋文移等類總為一集以其集於是年故以其年數
命之曰甲子集云夫甲者造物之始數之所由生也故
黃帝迎日推策而使太撓造焉以之統運會記歲月書

日時起消息正氣候定律厯故凡言年數者皆本焉絳縣老人之對晉大夫是已余之生也在甲戌元末癸未之季數往者順至於甲申又至於甲午又至於甲辰又至於甲寅今又至於甲子幾一周焉蠱之繇曰先甲三日後甲三日其象曰終則有始天行也先夫甲者三焉所以原其始也後夫甲者亦三焉所以要其終也天之道如是況於人乎余之事業先夫甲以為始者則具夫是矣其後夫甲以為終者則將本夫是以為始焉知來

者逆引而伸之則自甲戌之元復至甲子互為始終殆
無窮焉余得俛焉日以孳孳而已矣故自是集之外隨
年增入者皆繫之甲子云且甲者甲圻也物生之始也
子者滋也氣生之始也余今處於絕地天窮而人厄焉
窮則變變則通將如天地解而雷雨作百果草木皆甲
圻迴一氣於地中鼓萬物於天下雖明夷之闇不失箕
子之貞撲滅彗孛搗長庚之光焰以光旭日庶幾終至
於萬丈云六年夏五月陵川郝經序

原古錄序

中統七年春王正月猶在宋之儀真館十五日己未原
古錄成叙曰昊天有至文聖人有太經所以昭示道奧
發揮神蘊經緯天地潤色皇度立我人極者也故自書
契以來載籍所著莫不以文稱天曰天文人曰人文堯
曰文思舜曰文明禹曰文命西伯曰文王周公曰文公
仲尼之以道自任也曰文王既沒文不在茲乎皆言文
而不及道則道即文也觀夫揭日月運寒暑翳雲霓幹

星漢組布綦列煥乎有文覆冒磨盪庶物出焉則天之

道可知矣載太華振河海敷原隰固谿壑涵負岨

音倨岫

音物穆若有章發育蕃衍庶物生焉則地之道可知矣家

焉而生聚教育國焉而經理安定耕鑿疆畛之有限宮

室車服之有數貴賤親疎之有叙爵祿上下之有分典

則采物粲然有法庶事治焉則人之道可知矣非是則

三極之道莫得而見也則文即道也道非文不著文非

道不生自有天地即有斯文所以為道之用而經因之

以立也故文之大端本於太極而經之法制成於聖人
天之文本然而固有矣其推步歷象始於黃帝而成於
堯於是乎履端舉正敬授人時而天之經立矣地之文
亦本然而固有矣其荒度疏治始於后土而成於禹於
是乎地平天成蒸民乃粒而地之經立矣人之文麗乎
兩間畀賦蘊畜尤所固有也其裁成制作始於伏羲之
畫卦見於唐虞之傳心備於周公之制禮成於仲尼之
修經於是乎推本四象貫三為一盡兼天地之文元亨

利貞乾有四德直方大利坤有四體仁義禮智性有四
端易書詩春秋而人有四經萬世有統萬物有紀萬事
有制太極之統體昭著而道之大用無窮是以仲尼氏
沒大經與天地並為至文疑為名教至於今而不可易
也雖駁雜於戰國火於秦黃老於漢佛於晉宋齊梁魏
周隋唐而大儒傑士相繼而出孟軻韓愈則浚源張本
雄辨力抵廓清禦侮接續正傳荀況董仲舒劉向揚雄
王通則著書立言尊王賤霸修仁明義表章儒學陳搏

周敦頤邵雍程灝程頤張載朱熹則根柢致命盡性窮理比象衍數直造聖地孔安國毛萇鄭玄何休王弼杜預范甯孔穎達則掇拾補綴緯章撥燼反復訓詁申明經旨司馬遷班固荀悅陳壽干寶范曄沈約李延壽宋祁則罔羅遺文抽閱秘記藻飾言動完具國典以為信史樂毅張良賈誼汲黯蕭望之丙吉魏相袁安楊震李固陳蕃孔融諸葛亮羊祜王導劉琨謝安王猛高允房玄齡魏徵褚遂良狄仁傑姚崇宋璟張九齡顏真卿陸

贊權德輿裴度李德裕王朴竇儼趙普王旦寇準呂夷
簡范仲淹韓琦文彥博富弼歐陽修司馬光則挺特瑰
偉神明博達剛大諒直閎肆尊顯佐王經世撥亂反正
以為事業戰國之莊周屈原宋玉商鞅韓非李斯漢之
鄒陽枚皐東方朔司馬相如王褒劉歆張衡崔瑗蔡邕
魏之曹植王粲陳琳阮籍嵇康晉之張華左思潘岳陸
機孫綽袁宏陶潛南北之謝靈運顏延之任昉鮑昭江
淹謝朓溫子昇徐陵庾信薛道衡唐之陳子昂張說蘓

頌李白杜甫元結李華賈至楊炎常袞李翱皇甫湜劉
禹錫柳宗元白居易元孺牛僧孺皮日休杜牧陸龜蒙
司空圖宋之楊億王禹偁夏竦蘓洵曾鞏王安石蘓軾
蘓轍呂惠卿李清臣黃庭堅張耒秦觀晁無咎金源之
韓昉蔡珪党世傑趙汾王庭筠趙秉文李純甫雷淵麻
九疇則鼓吹風雅鋪張篇什藻飾綸綍列上書疏敷陳
利害詰竟論議雕繪華采瑱琢章句摛抉造化窮極筆
力精覈義理照耀竹帛刻刻金石撼搖天地陵轡河山

剴切星斗推盪風雲震疊一世作為文章皆有書有集
有簡有策名家傳後於是大經之枝葉蔽蔭六合其穉
萌孫根籠絡八表源委波瀾放乎四海堯舜禹湯文武
周孔之緒闡焉而不墜道德仁義大中至正之理嚼焉
而不昧男女夫婦父子君臣之倫截然而不亂禮樂刑
政文物聲明之典粲然而不亡中國四方剛柔燥濕之
俗判然而不雜彼異端邪說干時妨政喪心惑志者焉
能行宵臆於其間哉故斯文之大成大經之垂世名教

之立極仲尼之力也斯文之益大名教之不亡異端之
不害衆賢之功也自源徂流以求斯文之本必自大經
始邇流求源以徵斯文之迹衆賢之書不可廢也嗚呼
近世以來夸毗者不務實學翫骹蕪穢纖艷侈梏然
恣肆以古為野徵幸者干祿詭獲祇務速售破碎綴緝
無復統紀以正為左穿鑿者窮竒索隱嗜新歆異臨深
為高自以為得以訓傳為膚淺偽妄者談天說命立聖
遺世動闕鬼神言涉造化以文章為末技誕幻者朋扇

異教剽飾虛偽欺世罔利詭譎深阻以吾道為土苴俾
大經淪棄斯文委地此原古之所以作也原古所以正
今也於是斷自先秦以及於今六經之本真子史之幾
衡諸家之要刪衆賢之傑作原於道德傳於義理合於
典則可以為法於後世者則並錄之其所作則各附於
其人其人則各附於其代其叙則各以其代為先後其
體則各附於其類以其皆本於經故各附於經如原序
論評辨說解問對難讀言語命十有四類皆義理之文

易之餘也故為易部國書詔赦冊文

哀謚冊告南郊昊天上帝封禪冊

制制策令教下記檄書疏表封事奏議牋啟狀奏記

彈章露布牒二十有三類皆辭命之文書之餘也故為

書部騷賦詩聯句樂府

樂章

歌行吟誦篇引詞曲長句雜

言律詩

絕句

十有五類皆篇什之文詩之餘也故為詩部

碑銘符命頌箴贊記紀傳志錄墓表墓銘墓碣墓誌

墳版

墓版權厝志誌文墳銘殯志歸祔誌遷祔志蓋石文墓磚記墳記葬誌

誄述行狀哀辭雜

文雜著二十類皆紀事之文春秋之餘也故為春秋部

凡四部七十有二類若干篇若干卷部為統論類為序
論目為斷論凡立說之異同命意之得失造道之淺深
致理之醇疵遣辭之工拙用字之當否制作之規模祖
述之宗趣機杼之疎密關鍵之開闔音韻之疾徐氣格
之高下章句之聲病麤鑿鉅細遠近鄙雅皆為論次本
之大經以求其原邃古無上之面目太極造始之樞紐
鴻荒冲漠之兆朕渾淪灝渺之津涯死生終始之橐籥
陰陽鬼神之情狀穹象厚垠之端倪倫類事物之條貫

命性心跡之位置政典維綱之軌度治亂安危之運世
山嶽丘陵根柢之所繫江河湖海之所托雷霆風雨變
化之所起蟲魚草木生植之所因雲煙花鳥月露態度
之所極金璧珠貝錦綺光采之所發琴瑟鐘鼓磬管音
節之所契天球河圖大玉琬琰之秘藏布帛菽粟果菜
水火之日用衆人之所未睹天下之所共見搜抉振暴
羅列而進盡在目前非特以正今亦所以正昔庶幾先
賢之用心不為後世所誣仲尼之道家至日見牛童馬

走皆與斯文邪說無自而入大經業萬世名教垂百王
彼偽妄誕幻之徒不復敢以區區藝能視之而忽蔑也
或曰昔王通續經論者以為僭而自聖子是之作得無
似之乎曰夫經不刊之典也易本三皇書本五帝詩本
三王春秋本五伯故皇帝王伯為易之體虞夏商周為
書之體文武周召為詩之體齊楚秦晉為春秋之體前
乎犧炎則不足徵後乎桓文則不足法數千百年離為
四經混然天成不可加損不相參涉而無間斷後世雖

復有仲尼亦不能復為也況王通乎當偏駁之極壞亂之餘而以私意效聖人贊易道續詩書修元經直以繼夫經自以為仲尼復出是以謂之僭也今之所錄推廣聖經之餘裔以為斯文之命脈爾古今文章皆經之所出萬言千論不能有以外而莫能及焉為之羣分類聚論定區別以稽其變益見經之大聖人不敢覬覦則尊經也夫豈僭乎哉江淮荆湖南北等路宣撫使入宋國信使翰林侍讀學士郝經序

太極演總叙

天下之理一隱一顯而已矣故其間有開闔之機總萃之體變動之用布散之迹焉其始焉皆自夫隱而出也其終也皆自夫顯而反也於是天下之理無滯無弊道之大用全體旁行而不流確乎其不可拔而不易而易行乎其間妙萬物而為神翕然而藏天地萬物無不隱闢焉而生天地萬物無不顯一翕一闢一生一藏一隱一顯所以為道所以為易所以為神天地萬物至今而

不窮至今而冥冥也至今而昭昭也是以聖人作易推其隱者而為贖為密為幽為深為幾為微窮原築底而無上反而為顯於是為太極推其顯者而為圖為畫為卦為爻為象為數為辭為說亦窮原築底而無上復反而為隱而止於太極故易之為書本末一隱顯太極則其開闔之機也總萃之體也變動之用也布散之迹也故道易神之蘊奧皆具於太極而伏犧發之伏犧之圖文王之卦周公之爻孔子之象皆自太極推出而孔子

獨為言之故易有太極而太極易之本也學易者必先
求其本本得而易道可求矣攝網者必提其綱衣裘者
必挈其領入室者必由其戶也由孔子而來言易者衆
矣開卷而便及乾坤直造犧文莫不忽恍茫漠以為高
深幽遠至簡至易者而以為至煩至難夫易成於四聖
人之手莫不先後相因伏羲演河圖文王演伏羲周公
演文王孔子演三聖後世之言易也則在夫孔子之後
矣故當由孔子之易以求三聖之易自流祖源由末及

本也孔子之易其象象文言說卦序卦雜卦皆所以承
三聖人擴而充之也其繫辭上下探索犧文之前包舉
萬世之業其決示道本挈舉易鈕轉幹神機推出兩儀
四象造起天地萬物則在夫易有太極之一言固當即
此以為學也知孔子之易則知三聖之易矣嘗聞之師
讀易者當先讀繫辭其次說卦序卦雜卦其次讀乾坤
二卦既精且熟然後讀屯蒙諸卦此學易之序也蓋意
言象數之本皆在於是矣故取太極一章以為學易之

標準類繫辭文言說卦象象之名義探諸太極之前而演其隱微諸太極之後而演其顯問津洙泗以及河洛遍參諸儒庶幾數年之後可以學易觀道易神之髣髴不失吾身之極焉故取道易神等二十三條為一類合為一圖以示其序而各為之說謂為易道蘊極演諸太極之前者也其次取太極等六條為一類合為一圖以示其序而各為之說謂為易有太極所以演太極也其次取易書詩春秋論語大學中庸孟子名義人與皇極

等凡二十四條為一類合為一圖以示其序而各為之
說謂為人道建極合隱顯而立極成易也其次分易為
四為伏羲易文王易周公易孔子易合為四聖易圖以
示其序而各為之說為之圖演太極之後所以成易者
也其次為孔門言易諸儒擬易傳註疏釋等類以為易
之支流餘裔見太極為易之用極盡而無極神而明之
存乎其人焉爾矣凡十類六十篇總謂之太極演云年
月日陵川郝經書於儀真新館

周易外傳序

孔子承三聖之易為之作傳凡道德之要性命之理幽明之故死生之說天地人物之在夫意言象數之間者莫不充周表著推致其極易於是乎集大成聖人大經大法之原而不可加損焉蓋數聖人之制作孔子復以聖述聖故也後之人德未至於聖欲以一己之見求夫數大人之意雖敝精極神不免於猜揣料量之私不能造夫真是或有見焉而不能純備斷然自作則違戾遠

甚是以紛紛藉藉至於今而不已也夫易聖人所以用
道之書也伏犧氏按圖畫卦以述道造書契以開斯文
之統厯數千百年至於黃帝堯舜氏而法制始備又厯
夏商千有餘年而文王受命作周重伏犧氏之卦繫之
辭而命之為易聖子周公心傳口授分其文而繫之辭
以斷其吉凶復六百有餘年而孔子出焉晚年讀易而
韋編三絕以求三聖之意於是退而修經推皇帝王伯
之世而本乎伏犧終於五霸列為四經而為易作傳尊

之為經以冠夫詩書春秋使天下萬世共用一道舉畫
前之固有重後之逆數造無窮之形器壞無窮之形器
而一易之用不可勝窮矣則伏羲氏述道文王述伏羲
周公述文王孔子述三聖世代相去若此其甚遠也聖
人之作若此其鮮也以聖述聖若此其恭也至孔子而
僅為成書猶以為書不盡言言不盡意加我數年五十
以學易可以無大過則易之大不能一聖人當一世而
為之必數聖人數十百世而僅成以孔子之聖不敢自

作曲為之述而猶以為未既盡而懼或有過後之人乃欲以一己之私遽述數千載之德業四聖人之能事又輒自作為不亦難矣哉且自孔子沒曾子子思孟子得其傳而著之書雖皆易道而不及易中一言繼而火於秦雖幸而以卜筮之故易之書獨存天下之人祇以卜筮視之而其道不明也漢興言易自田何本其所自謂孔子授之商瞿子木而授受及何何為傳數篇而不傳自是學各專門原遠而末益分矣揚雄之學最為深到

準易作玄而不述易道東觀學者雖盛而祇為傳註之
學亦各專門自私而明夫易道者亦鮮魏正始間王弼
以二漢之學為之註唐世以為至當而孔穎達為之疏
學者至今宗之殆亦專門之學也寥寥千載竟無聖人
而述聖人家異傳人異義易道不可復聞矣故王通謂
九師興而易道微三傳作而春秋散惡其私而專專而
分分而異卒使聖人之意不可得而見也宋興大儒輩
出莫不以闡明易道為已任於是華山陳搏肇開宗統

而漣溪周敦頤西都邵雍遠探義文周孔之業推演意
言象數之本至侍講程頤大變傳註為易作傳直造先
秦布武聖門其諸師友更唱迭和易道幾明今二百有
餘年矣學者復各擅其師傳立論馳說求新角奇誕夸
而自聖言義理者不及象數象數者不及義理又往往
雜入偏駁小數異端曲學周邵程氏之學復昧沒而不
明其謂王弼茂正義厚誣妄訾悖理傷道者不可勝紀
又甚於專門之弊矣反復壞爛遂至此極世代如是之

遠聖人不作如是之久蠹食穿鑿如是之衆且多也又
豈一人之專見臆戾所能蔽之哉則聖人之意終不可
得而見矣竊嘗以為後世雖無大聖人兼綜諸聖以述
夫聖如孔子之集大成苟不以一人自私曲學自蔽專
門自聖削去畦町沒夷滋蔓排斥一我開示公道合漢
魏唐宋諸儒之學順考其往逆徵其來積數千百年之
學問數十百人之能事契其所見會其所得合天下以
一心通天下以一理貫古今以一易聖一而後世百之

聖十而後世千之邇流求原問津以濟乎道則亦庶乎其可也故不自揆嘗欲論次孔子以來述易而有合於聖人者纂為一書而未能也中統元年詔經持節使宋宋人館於儀真留而不遣五六年間頗得肆意經傳及被刳殺出居別室益曠寂無事乃據所有書及故所記憶者自孔子以來迄於今凡訓詁論說諸所註釋覈其至精去其重複義理象數兼采並載巨細不遺不徵其人惟是是與各以世代第其先後凡諸經傳子史百氏

易之自出而不謬聖人必當闢涉引用者亦各依世次
編入其流入老佛異端曲說非聖人意者則盡刊黜夫
漢魏傳註之學則至於魏王氏唐宋論議之學則至於
宋程氏故備錄二氏以為諸家折衷經有所見聞者則
彌縫其闕而要終之且徵之歷代之得失以為易之事
業窮源極委致諸道易神之本然以為一經之綱領疑
而不可固必者則存而弗論以俟能者積成八十卷旁
搜遠蹈創圖立說為太極演二十卷申明列聖及諸儒

餘意共為一百卷易之成俶落周世謂之周易近世或單稱易及大易等以為題而不言周有未當言者故仍稱周易孔子為經作傳既謂之傳矣後之人復為傳註則皆傳外之傳也故曰為外傳且示不敢自同於聖人之作也然亦未敢自為成書後來繼今或別有所得當復增入云九年春正月立春日郝經序

續後漢書序

漢建安末曹氏廢漢自立稱魏孫氏據江左僭號稱吳

昭烈以宗子繼漢即位於蜀討賊恢復卒莫能相一而折入於晉晉平陽侯相陳壽故漢吏也漢亡仕晉作三國志以曹氏繼漢而不與昭烈稱之曰蜀鄙為偏霸僭偽於是統體不正大義不明柰其網維故稱號論議皆失其正哀帝時滎陽太守習鑿齒著漢晉春秋謂三國蜀以宗室為正魏雖受漢禪晉尚為篡逆蜀平而漢始亡上疏請越魏繼漢以正統體不用宋元嘉中文帝詔中書侍郎裴松之采三國異同凡數十家以註壽書補

其闕漏辨其舛錯績力雖勤而亦不能更正統體厯南北隋唐五季七百有餘歲列諸三史之後不復議為也宋丞相司馬光作通鑑始更蜀曰漢仍以魏紀事而昭烈為僭偽至晦庵先生朱熹為通鑑作綱目黜魏而以昭烈章武之元繼漢統體始正矣然而本史正文猶用壽書經嘗聞縉紳先生餘論謂壽書必當改作竊有志焉及先人臨終復有遺命斷欲為之事梗不能中統元年詔經持節使宋告登寶位通好弭兵宋人館留儀真

不令進退束臂抱節無所營為乃破藁發凡起漢終晉
立限斷條目以更壽書乃作表記傳錄諸序議贊十二
年夏五月令伴使西珪借書於兩淮制使印應雷得二
漢三國晉書遂作正史以裴註之異同通鑑之去取綱
目之義例參較判定歸於詳實以昭烈纂承漢統魏吳
為僭偽十三年冬十月書成年表一卷帝紀二卷列傳
七十九卷錄八卷共九十卷別為一百三十卷號曰續
後漢書奮昭烈之幽光揭孔明之盛心祛曹丕之鬼蜮

破懿昭之城府明道術闢異端辨姦邪表風節甄義烈
核正偽曲折隱奧傳之義理徵之典則而原於道德推
本六經之初苴補三史之後千載之蔽一旦廓然矣古
之為書大抵聖賢道否發憤而作屈平離騷馬遷史記
皆是也然皆曠昧一時流光百世故韓愈謂以彼較此
孰得孰失今拘幽之極而集是蓋亦失中之得古人之
志也嗚呼安得復於先君而告卒事乎十有五日庚子
具位陵川郝經序

玉衡真觀序

人並天地為三極其為道則一凡義理象數皆所固有
學必周知然後為至已是以聖人仰觀俯察範圍曲成
推步占候以為大法著之詩書六藝謂夫人而所當知
也故自天子至於列國各有官守以世其業其法家至
日見猶夫土田疆理州閭井邑人能道之於是一世之
人莫不知天祇畏奉事恐懼修省通三極為一敬貫萬
變為一誠天命不違人心人事合於天道天與人一純

而無間所以為二帝三王之世也及周之衰如螭螭巷
伯大東定之方中漸漸之石等作皆細民官寺役徒之
辭亦能言天以為風其列國名卿賢大夫于變異之際
道其所以然言君而迪畏乎天如裨竈梓慎萇弘晏嬰
往往有之仲尼之門顏閔而下七十子三千之徒問學
之際一不及曾子子思孟子著書難疑答問而亦弗及
皆知其法以為常事置而弗論文武之道在人而先王
之澤未斬也至戰國縱橫異端並起道庵術雜莫不以

人勝天天人始二視天夢夢于已無與放辟邪侈無所顧忌怪異疊出不知警懼益殺人以逞卒皆大亂亡滅其遺書古法或有知者如子韋唐昧尹臯甘公石申呂不韋各專門名家無復大聖大賢之能事一世之通學為陰陽數術之流矣然賴數子傳其緒業漢興學者得以尋繹於是張蒼司馬談及子遷鄧平唐都落下閎董仲舒劉向揚雄班固馬續張衡鄭玄劉洪譙周皆著書推行而翼奉李尋谷永蘓竟郎顗襄楷蔡邕于昏君亂

朝橫身論列壓之以天懼之以禍使聞者奪氣流汗謂
之天諫大有功于漢室于是四百年間復知畏天有三
代之風焉南北七代其太史多能占測以言休咎儒者
則猶有崔浩高允漢氏之遺烈也隋唐以來學者以為
異端音諛音道而恥言之其星翁厯史列于有司備員而
已復設私習天文之禁使天子至於庶民皆戴天而不
知所以為天至有謂天變不足畏者于是三代二漢之
學絕矣經自知讀書即嗜天官學常欲纂古遺法以合

天人求其所以然畏法律禁忌而不敢為今上即位之
元年詔經持節使宋告登寶位通好弭兵宋人館留儀
真積年不遣曠寂無聊乃改修陳承祚三國志至為八
錄推本六經三傳諸子史自漢魏晉隋唐諸天官書志
及所齎宋金源氏與本朝燕都臺司秘書為厯象錄具
述厯代星厯傳之以理既成書狀官苟宗道為之音註
請別為一書乃更論次復加損益益之以圖象細行厯
變異事應等類凡十二卷名曰玉衡真觀天地之道真

觀者在璿璣玉衡所以觀之也拘幽之中仰視片天十
餘年間凡天地日星之變徵之於書若合符節嗚呼安
得弛習天之禁以是進讀於人君傳之學者使天下後
世復盡知畏天哉中統十四年癸酉六月十五日丙申
具位陵川郝經序

變異事應序

孔子作春秋書日食地震星變議而不辨故不言其事
應至左氏作傳始具載占侯之辭與其事應于是史記

漢書歷代諸志皆宗其法事與變符而象占有徵矣夫
人之善惡兆乎思慮必動乎四體而其憂喜必徵於聲
色見於氣貌蘊於內則必發於外而不能掩況事變之
大者乎將有大故陰幾沈潛而鬼神已知其氣焰朕兆
必見於天不能恐懼修省以圖消弭則事必效而無及
矣嚴哉懍懍乎天人之際甚可畏也君子所以懲忿窒
慾慎獨而戒於屋漏絕惡於未萌弭變於幾先也邵康
節曰思慮未發鬼神莫知不由乎我更由乎誰思慮之

先藏密之地閑邪存誠可不務乎故修省於無變之時者上也遭變而修省者次也事變尋至而不悟者刑戮之民也紀變異徵事應布列簡牘以詔以告其扶助道教至班固漢志曰古厯五星之推亡逆行者至甘氏石氏經以熒惑太白為有逆行夫厯者正行也古者天下太平五星循度亡有逆順日不食朔月不食望自周室衰亂臣賊子師旅數起刑罰失中雖其亡亂臣賊子師旅之變內臣猶不治四夷猶不服兵革猶不寢刑罰猶

不錯故二星與月為之失度三變常見及有亂臣賊子
伏屍流血之兵大變乃出甘石氏見其常然因以為紀
皆非正行也劉向亦言日月食及五星逆行非太平之
常自周以來人事亂故天文應之遂變耳是殆不然夫
有人事即有天變雖聖王在位極治之世不免於疾病
憂戚死喪誅罰更革廢置予奪征討而天地日星亦不
無崩震鳴裂薄食移徙飛流逆順伏見犯守第治世鮮
而小亂世多而大耳以黃帝堯舜禹湯文武周公之治

亦有征伐戰鬪流放誅殛拘幽誣誚叛逆崩殂之事其九年之水七年之旱桑穀共生大風拔木等亦書于策豈天地無變二星不逆行乎且仰觀俯察推測占稽皆聖賢之能事其書之必備第以秦人焚滅典籍二帝三王之簡策暨西周之行事皆沒而不得聞故其變于事不可徵也賴孔子作春秋左氏為春秋作內外傳東都以來纔見一二變應可得而述固向據之遂為周衰日月始食五星始逆行甘石所紀非正豈通識哉今據春

秋左氏傳國語託始於周幽王據史記二漢書三國志
晉書終於晉恭帝宋高祖之篡上記其變下列其事各
別為章凡一千一百六十九年君臣父子之間中國外
域之際兵戎之起誅殺之行崩薨之象篡弑之端僭叛
之由割裂之勢專擅之故亂亡之本自王而霸自霸而
雜曰流曰下兆變於上應之於下者亦已備極姑為占
候之案其占法已各具經星緯曜諸星氣本宮下故皆
畧而不書

陵川集卷二十九

欽定四庫全書

陵川集卷三十

元 郝經 撰

序

送常山劉道濟序

歲癸卯秋八月道濟兄南歸經為之言曰道之不行也
非謂佛老小人之相害也由君子之自不行耳道之不
競也非止謂君子之不自行也由反倡佛老小人之為

禍耳蟲生於木而蠹其木則木萎而蟲死焉有挫其本而能振其末者哉已為之已得之已不為之已何得哉苟君子能審其道而篤行之佛老小人雖盛也殆將何所至乎苟不能也不反倡之而為禍以戾天之定猶可也倡之而為禍拂天理而絕吾道乎則彼將肆行而莫敢誰何也昔也自宓犧至於舜道傳而天天傳而人人自道矣自湯至於文王人傳而天天傳而道而人亦道矣自周公至於孔子道傳而書書傳而人而人猶

道矣孔氏而下人失其道孟軻猶能道其道天其天人
其人書其書使人不入於楊墨而為非類矣後雖佛老
更興異端並作揚王韓歐之徒衡而爭之猶能扼其吭
而斷其舌使人知有此道矣今之君子非不能爭之又
特倡之倡佛老而為禍虛無寂滅乃曰此可以致精微
而保吾生也鼓小人而回天衷蠱賊生靈為鬼而為賊
乃曰此可以致富貴而充吾欲也侮聖人非聖言繪句
雕章謠東風而咏楊柳乃曰此可以大吾聲名而廣吾

業也故其身愈張而心愈亡欲日彌而道日微此道之
所以不行也於戲吾道也天道也地道也人道也夫如
是將壞天地而絕人類歟誠欲壞天地而絕人類則吾
徒何生也天既使吾徒生則道之將行也歟

唐宋近體詩選序

事有至大物有至多者萬言之文不足以盡其理詩四
句何以畢之所謂至簡而至精粹者也故必平帖精當
切至清新理不晦而語不滯庶幾其至矣五言難於七

言四句難於八句何者言愈簡而義愈精也譬如觀山諸山掩映中有奇峯一二則諸山皆美矣若一二奇峯平地而立便有峭拔秀潤氣非樓石劒門少華則不能此絕句全篇詩人所尤重也今集唐宋諸賢絕句全篇之可為矜式者與夫傑辭麗句之可以警動精神者條例而次第之為訂愚發蒙之具雖末學亦窮理之一事也學者其無忽歲甲辰八月二十五日陵川郝經題

再送常山劉道濟序

中國之勢不振正大之道不明禮樂之治不興天地一元之氣湮淪茫昧杳然廓然者豈無所自而然乎必有以也世無昌揭之士故亦無明盛之功而庸鄙樸樸乘漏抵罅私小惠立小道銜規規之文信淺淺之議擅子子之學以愚吾民以誤天下以基禍亂而自謂經綸大手古莫我若舉世而不能辨比行而不能改此故之以也是以如是其危且亂久且遠而莫之或止矣噫其猶是而遂陷吾民為禽犢乎抑亦將遂崩陵而浸以勦絕

乎其亦鬱之久悖之極亂之至將大有以昭晰也否之
上九曰先否後喜剝之上九曰君子得輿小人剝廬蓋
為否極而必泰亂極而必治也今而危亂既極矣天亦
將興明盛之功也欲興明盛之功則所謂庸鄙樸樾者
必大殄也而儲靈孕秀必芬芬郁郁巍巍昂昂而降昌
揭之士也必學崇高廣大有用之學必恢宏遠博達有
為之器必施聰明睿知神武不殺之材而使敝者振闔
者明廢者興除百世之害富百世之用享百世之譽任

百世之責奮乎百世之上俾百世之下必仰之如日星
重之如山嶽矣豈堂堂天地幹制萬化欲興明盛之功
而寂寥索莫乃無此人哉必有之矣其興於此時也余
亦必得而見之矣由是則余輩之所以誦書學道修身
立志者乃有所試也天期不愆屬運而會則結余髮斂
余衽高山仰止景行行止其無空老矣天而不欲已亂
也則之人也之功也與余輩之所學及余輩之所期者
庸可冀乎其斃而已也必矣若道濟者其誼高學之正

器之遠以大又非余輩之可企也所謂昌揭之士也其
興明盛之功也必矣於其行序而勉之十有一月五日
也

送太原史子桓序

霜風呼沙陰霾悅天拉苴而號枯昏曠曠驚虺虺道殣
裂膚而羸卒墮指者相望也宜乎擢戶寧處以充天地
之閉塞贊玄冥之化育史夫子胡為來哉其有驛傳之
急而郵檄之遽歟則宜有貂貉之重狐續之溫而夫子

累乎其單也其有貴俠之游校獵之樂而衝風冒寒而出也歟則宜夫腰金而宴饗鳴弦而挾矢而夫子永髯局脊扶蹇而癯也其欲徒步千里扣閭闔而振長策乎其欲搖吻於諸侯之上奔厯於權勢之路締從連衡合鬪而弭兵乎其為龍斷之利而戰寒暑於道路乎其欲苟富貴務僥倖而以驕妻妾恣嗜欲乎是數者皆世人之所奔競知愚之所共趨雖外寒暑而必為者也夫子寧有於是乎夫子之操之志以父之故而越險阻犯霜

雪跋涉山川餓體凍膚而不顧箝口槁腸而不恤窮天地之所覆載際日月之所照臨汲汲遑遑斃而後已庶乎其一遇也嗚呼篤孝哉史夫子乎犯霜雪之志則亦古人寢冰之志也唯天福善應誠其亦必有遇也已觀夫霜雪之塗冒寒而往來者或以勢或以利或以智出於一塗而志趣之異也如此則夫觀路人者不宜一以路人觀之也丁未冬太原史子桓索父不獲過保下適燕都書此以贈

送漢上趙先生序

窮先生者此行也達先生者亦此行也漢淮亡纍俘北
首件異俗而荏異聲茹腥衣毳而不獲安土敦化振書
閭闔矢謨廊廟致君乎三五赫耀文明之光賁冒草木
樹正大之業宏徽行之號則此行也窮先生者也雖然
窮乎此而達乎彼果窮也耶先生嘗蹈夫常矣而未蹈
乎變也嘗行夫一國矣而未行乎天下也天其或者欲
由常以達變由一國以達天下歟昔之所覩者江漢荆

衡而已今也仰嵩高瞻太華涉大河之驚流視中原之
雄浸太行恒碣脊橫天下昔之所遊者荆吳閩越而已
今也厯汴洛睨關陝越晉衛觀華夏之故墟觀山川之
形勢見唐虞三代建邦立極之制齊魯聖人禮義之風
接恒岱之曠直激燕趙之雄勁昔之所學者富一身而
已今也傳正脈於異俗衍正學於異域指吾民心術之
迂開吾民耳目之蔽削蕪漫斷邪枉破昏塞俾六經之
義聖人之道煥如日星沛如河海巍如泰華充溢旁魄

大放於北方如是則先生之道非窮也達也士居中守
正執德不回明通人物密格鬼神而大參天地恒達而
不窮素患難達於患難素夷狄達於夷狄時有時而窮
事有時而窮理則達矣噫仲尼窮於行而達於聖孟軻
窮於行而達於賢史遷窮於行而達於史杜甫窮於行
而達於詩韓愈窮於行而達於文果窮也邪此行也人
視先生以為大窮經則以為大達先生可縱軌揚轡沛
胷中之浩浩駕通達之坦坦勁行而無慮矣鄙辭滋蔓

不足以爲臚姑以爲繞朝之韞

送鄉先生宋君還燕序

觀君子之所養不于常于其變變于外而不變于內者
養焉者也變于外而內亦變焉者無所養者也天命我
以德執之不回守之不易養之無害而已矣我何加損
焉又何榮落得喪之足變於其間哉故君子無變非無
變也變在物而不在我也大浸稽天而我不溺燧火灰
山而我不熱疾雷破柱而我不動彼則變矣奚事於我

哉此君子之所以有所養而無所變也觀所養則觀所
變而已矣小有所得侈焉爾小有所失蹙焉爾區區於
銖兩汲汲於毫末俚焉如俑者則其所養可知己鄉先
生宋君經自垂髫識於保下而氣若是言若是行與文
若是已而北歸紛拂而不救窘散而不支厄遷顛躓而
不振殆一紀焉戊申秋復一拜于保下而氣若是言若
是行與文若是不少變焉由此觀之先生之所養亦可
知己於其還也而為之序以識先生之養與余觀變之

所得云

送王之才南遊序

君子之動無苟焉爾矣動為一身則有一身之義也動為一家則有一家之義也動為天下則有天下之義也內焉而有所定外焉而有所止動而必中中而必可法於時人昭於來世而必無所苟焉如是可動矣故伊尹一動而成殷太公一動而興周子房一動而起漢孔明一動而王蜀不然則食蔬而衣敝處僻而居陋安時而

守順存心而養性不動而可也彼躍馬揮鞭橫金匝玉
被貂厭毳不避燥濕寒暑弊弊焉跌蕩唐突於浩浩之
塗者謂之為身動也則心溺而形枯奔蕩蹶趨不能固
筋骸之束矣謂之為家動也則尊卑倒置疏戚逆處父
子無以親夫婦無以別長幼無以序矣謂之為天下動
也則治亂安危之道戡定寧一之理彼惡足以知之不
過夫苟富貴役趨走奔競夫勢利之間耳是以目途中
觀道左未嘗不為三嘆也友弟之才積精蘊志儲秀孕

靈靜而養之有日矣而未見夫動也諺有之三年不蜚蜚將衝天三年不鳴鳴將驚人今膏車秣馬將有所動也果為一身歟為一家歟而為天下歟必一夫此以正大之學著高明之業振起衰俗使天下知余後學之有人矣而不一夫趨走富貴奔競勢利也余方恬處靜以自存吾子其著鞭前路不失其馳而後有忻慕者矣

括囊圖說序

人肖天地以生者也故有心中之天地有掌中之天地

有書中之天地蓋天地之理在人心而其文在指掌其象其畫則在乎書是三者人之固有而所當知者也而俯仰之間舉世而漫不加省與草木共朽而不悟可乎哉夫知天之所以然則知日月星辰之所以然知地之所以然則知山河草木之所以然知其然不知其所以然又舉世之漫不加省與草木共朽而不悟者夫知其然者知其法也見其象也形而下者也知其所以然者知其理也見其心也形而上者也故邵子曰今之學者

知厯法而不知厯理能布算者落下閎也能推步者甘公也二人者知其法而不知其理者也唯揚子雲知厯法又知厯理故自三代而下以理合數知所以然者揚子雲一人而已子雲而下以理制形知所以然者張平子一人而已天之高星辰之遠宜乎無有能知者之人也而知之是根於人心之固有而所當知者也嗚呼仰而觀俯而察天地自若豈難知哉顧第弗學爾少陵杜君叔通博綜問學精於厯數有太史公家傳之秘懼學者

之以為難知而弗學也欲人之即法而知理也於是分
裂天地運行日月森羅星辰鳩為一書曰天地括囊圖
說使人開卷即悟灼然心見上章闡茂之冬與經會于
保下命題其端經方憤憤罔無聞知俯仰之間漫不加
省敢妄為滋蔓乎雖然契義之重有不克讓者故疣贅
而書之十月一日既生魄陵川郝經題

送柴梓材序

歲庚戌冬十有二月柴君梓材來先余於王內翰座識

其兄賢之而交未定也及梓材來氣爽而色潤容裕而禮下與之年年甚富與之語語甚和而節也乃嘆曰不有其中外其如是乎是必縉紳先生淵源之涵育賢父兄朝夕之訓誨不移於流俗而有守於中者也將告歸為之言曰今而天地自若也山川草木亦自若也何獨至于人而有變也哉人之性自若也其氣其形亦自若也何獨至於今而有變也哉學校之不興流俗之所移留而不反仆而不振潰亂而不救顛覆而不支疾日彌

留無有為藥而起之者卒至於元氣死而人道喪也雖然苟不顧流俗挺然特立誦書以益其智寡欲以全其仁力行以振其勇明王興而道行矣則可以革弊俗去弊政苴漏補罅張皇仁義致君乎三五躋民于壽樂拔鴻譽于無窮建碩業于不朽明王不興而道不行也則耕于荒閒之野釣于寂寞之濱抱明月而長歌吸孤風而高蹈亦可以養天倪而樂天命豈流俗之足移也孟子曰待文王而後興者凡民也若夫豪傑之士雖無文

王猶興夫若是是無文王而興者也真豪傑之士也嗚呼彼徇流俗合汙世黃金橫帶馳騫於天下者自以為豪傑也由是觀之果真豪傑也哉今昆仲既志於道卓然樹立終不為流俗所移則古之豪傑之士何遠之有於其行書以贈之

送道士申正之序

天地有剛大挺特之氣隨物而賦用宛轉旁薄豐湧曼羨囊括六合之外充塞六合之內明白輝光引而上也

則為日星巍業峻極萃而下也則為山嶽溶而流則江河鬱而茂則草木翼焉飛雲蹄焉走陸則鳥獸也皆是氣之用也其在於人則精淑純備溥博淵深剛而不撓大而不局挺特而不流卓犖而不倚紐而不睽結而不離宜夫養之而不害振之而不挫擴而充之而不弊淪而疏之而不滯以盡其用也而乃冒沒而使之不明委靡而使之不立狹其大而自小削其剛而自弱義大冠檐大裾駢風雲偶月露執筆綴辭而已未聞有以剛大

之氣正大之學振末俗而障頽波者一有長材偉人出
於其間則蝟起而疾視譁而攻之默而穿之必使之顛
踣壞亂而后已悲夫剛大挺特之氣不能自用而卒自
弊道之所以不明士氣之所以昧沒而不振也辛亥春
鄉叔申君正之馳驛至自燕余見其羽衣雲集環列拱
捧睜乎其光鬱乎其氣退而嘆曰盛矣哉是其所以主
盟其道而大行於世歟能全其氣而用之者也衆一而
氣集氣集而用大故離者可合而弱者可強是以犯霜

雪厯夷險而不阻振聲名宏教化而不侈去琳宮度沙
磧吟笑自若御使車奉王命恬然自得宜其光事三師
卓然樹立而不私屹若扶持而不墜也嗚呼彼方自振
如此吾徒自弊如此可若何正月六日陵川郝經序

儒行序

世之所謂儒者文章而已矣父師以之垂訓學者以之
為務有司以之進退多士是以翕然相尚炳然相輝而
儒之為儒不復古矣蓋文章者儒之末而德行者儒之

本也務其本而末自從有諸內則必形諸外韓之所謂
根之茂者其實盛膏之沃者其光晧仁義之人其言藹
如也則謂之儒者可工於文章而已矣乎文章工矣行
如之何秦君道隆志乎古者也欲學之知所先務乃取
儒行一篇并其傳注鋟木而版行之庶幾天下不獨以
文章為儒以德行者為儒也人之去浮華植本根草澆
訛尚忠信雍雍皞皞復古之治其張本於茲乎歲辛亥
夏五月甲戌陵川郝經序

刪注刑統賦序

宋真尚書德秀云金國有天下典章法度文物聲名在元魏右經嘗以是為不刊之論蓋金有天下席遼宋之盛監於二代擁八州而征南海威既外振政亦內修立國安強徙都定鼎至大定間南北盟誓既定好聘往來甲兵不試四鄙不警天下晏然大禮盛典於是具舉泰和中律書始成凡在官者一以新法從事國無弊政亦無冤民粲粲一代之典與唐漢比隆詎元魏高齊之得

廁其列也是時太原李祐之精專新律試吏者皆出其
門臺省寺監藩邸郡國名卿能吏郁然炳然癸丑春其
外孫劉君敬之出祐之刪注刑統賦一篇精約博綜首
尾原委有宗有趣酌人情而歸之中不峭刻不慘激本
之仁恕真蒞政之銓衡也熟之復之然後知真尚書之
言尤信國家今地過于金而民物繁夥龍飛鳳舞殆四
十年改正朔易服色修制度之事謙讓未遑雖然必欲
致治創法立制其先務也昔漢高帝百戰之餘食未下

噎而命蕭何造律令張蒼定章程韓信申軍法叔孫通制禮儀陸賈著新書史臣以為日不暇給而規模宏遠今有漢氏之地而加廣有漢氏之民而加多豈不為金源氏拓跋氏之治乎創法立制此其時矣發源張本必自是賦始敬之甚秀而文與余游者有年請題其端余謂之曰文中子居家不暫舍周禮門人問焉曰先師以王道極是也如有用我則執此以往通也宗周之介子敢忘其禮乎敬之其執此以往豈不為李氏之介孫乎

年月日郝經序

朱文公詩傳序

古之為詩也誦歌絃舞斷章為賦而已矣傳其義者則
口授傳注之學未有也秦焚詩書以愚黔首三代之學
幾於墜沒漢興諸儒掇拾灰燼壅荒闕原續六經之絕
緒於是傳注之學興焉秦焚詩書尤重故傳之者鮮書
則僅有濟南伏生詩之所見所聞所傳聞者頗為加多
有齊魯毛韓四家而已而源遠末分師異學異更相予

盾如闕雎一篇齊魯韓氏以為康王政衰之詩毛氏則謂后妃之德風之始蓋毛氏之學規模正大有三代儒者之風非三家所及也卒之三家之說不行毛詩之詁訓傳獨行於世惜其濶畧簡古不竟其說使後人得以紛更之也故滋蔓於鄭氏之箋雖則云勤而義猶未備總萃於孔氏之疏雖則云備而理猶未明嗚呼詩者聖人所以泰天下之書也其義大矣性情之正義理之萃已發之中中節之和也文武周召之遺烈治亂之本原

王政之大綱中聲之所止也天人相與之際物欲相錯之間欣應翕合純而無間先王以之審情偽在治忽事鬼神贊化育奠天位而全天德者也觀民設教閑邪存誠聖之功也所過者化所存者神聖之用也正適於變變適於正易之象也美而稱誦刺而譏貶春秋之義也故詩之為義根於天道著於人心膏於肌膚藏於骨髓龐澤渥浸浹於萬世雖火於秦而在人心者未嘗火之也顧豈崎嶇訓辭鳥獸蟲魚草木之名拘拘屑屑而得

盡之哉而有司設規父師垂訓莫敢誰何以及于宋歐陽子始為圖說出二氏之區域蘓氏王氏父子繼踵馳說河南程氏橫渠張氏西都邵氏遠探力窮而張皇之逮夫東萊呂伯恭父集諸家之說為讀詩記未成而卒時晦庵先生方收伊洛之橫瀾折聖學而歸衷集傳注之大成乃為詩作傳近出已意遠規漢唐復風雅之正端刺美之本釐訓詁之弊定章句音韻之短長差舛辨大小序之重複而三百篇之微意思無邪一言煥乎白

日之正中也其自序則自孔孟及宋諸公格言具載之
毛鄭以下不論其旨微矣是書行於江漢之間久矣而
北方之學者未之聞也大行臺尚書田侯得善本命工
板行以傳永久書走保下屬經為序經喜於文公之傳
之行與學者之幸且嘉侯用心之仁故推本論著以冠
諸端

率義會序

古者井天下之田制鄉飲之禮俾從居綦布守望相助

患難相救疾病相扶持起揖讓於閭閻生友義於里巷
使之睦嫻任恤宜弟和侃錄其倔強悖誕兇悍不馴之
氣銷天下之爭端而莫肯為亂後世先王之禮廢而人
道解散無情義以維其心骨肉睽為仇讐肝膽濶為楚
越於是戍卒役徒黥髡盜販敢為亂首厲階而天下被
其禍嗚呼聖人制禮之義其於維世不亦深矣乎順天
當燕趙之衝自昔號多豪傑兵亂以來三十餘年生聚
教育將復治平之舊俊茂輩出往往露頭角以氣相許

而合為君子之朋一日相率過余曰我輩十餘人欲以古井田鄉飲之義歲時羣聚凡吉凶賓嘉相脩而不相悖不尚華靡不為驕奢義則相勉而過則相告其有不如約者則會義而合攻是可行乎余應之曰是相率而為義者其誰曰不可乃名之曰率義會而為之叙其意又為之載其載書曰凡我同盟以義相合毋以利睽過則面質毋退後言險阻艱厄共為引手始終一心以崇大義各啟惓臆無或有慝有渝此盟明神殛之俾絀其

祿無以遠到

心庵先生陰符經集解序

大庭軒轅降及叔世道書穰疊往往備言曲論如數山石如觀海波故大者至數十萬言小者亦不下數千言至於陰符獨三百餘言而已於是厯為究竟意然後知至言必簡聖人之意有所靳也夫道幾而已矣非幾無以見也天地幾而已矣非幾無以用也故幾之所在不可周測通圓而神惟妙是用潛於動靜之理發於翕闔

之氣見於消長之象伏於存亡之形造起萬變樞泄運
化使天地萬物由之而不窮而天下莫能知莫能窮遂
為天下之至微陰符一書聖人所以發其幾攄其微示
人知而藏之密者也端緒則見引而不發天地萬物之
幾在我沈沈默默如執左契如持權衡無往而不合無
往而不中無往而不應無往而不時其體則靜其用則
無窮雖三百言而天下之理無不備故言道術者得之
則可以窮神知化握道之要言治體者得之則可以致

君堯舜隆平天下志士得之則可以籠罩宇宙揮斥風雲處士得之則可以藏舟于壑遯世無悶養生者得之則可以精神健羨騎氣御風數家得之則可以奇偶變化逆知來物兵家得之則可戡定禍亂從橫無窮萃而合之則一言散而推之則萬變其支流裔各底於成有不可勝言者嗚呼禍莫大於發人之幾聖人立經陳極則發道之幾故其情深其文切其旨秘以斥其辭約以要觸造物之忌許造物之蘊不敢備言曲論聖人之

意其深矣乎是書之有傳注尚矣三代而下不啻數十
百家各據其所見而各著其所傳莫有為貫而一之者
丙辰冬余外叔司馬可道來以心庵先生集註三十卷
見示天真皇人而下會義三十餘家末以己意為之結
斷汪洋炳烺周悉備至上下數千載始為完書且命經
叙其意先是常識先生於常山皇極道院而為之記今
其可辭於是推本論著而書其端先生姓趙氏名素字
才卿嘗被徵賜號虛白處士云丁巳元日陵川郝經序


送張漢臣序

卷三十

丁巳夏四月不雨枯風吹塵赤野立塊穡人焦勞額地
祈穀子張子奉其母以行既南轅陵川郝經告之曰之
時也之士也行安用也擢禮闈之桂探驪龍之珠振書
閭闔魁岸炳烺吾子之事也從史義列紆餘籌策撼搖
王公大人巍巍以樹立吾子之材也擴充王澤兼善致
治旱火不光而雨天下吾子之志也是三者吾子之所
固有而所素志也而乃問舍求田下元龍之樓而甘心

許汜與夫初心不既背矣乎張子曰噫吾以子為知己而莫吾知也孔席不暖墨突不黔而懷王者小人之事也得其時則駕不得其時則龍蛇行使止尼固非我之得專也紆朱紫步巖廊身名俱榮焜耀一世非吾所惡也負耒耜溷塵梗窮巷束臂蓬累而行非吾所欲也氣數使然固非我之得專也在我者盡窮達非我也在我者盡貴賤非我也可行矣雖無是行其無是行乎不行矣雖有是行其有是行乎故拔樹接淅微服絕糧聖人

所不免矧其下乎經聞其言以為向者知張子之淺而見其面乃今知張子之深而見其心也若張子者可謂速於行而以理自適焉者也於是書其言以贊其行



陵川集卷三十

欽定四庫全書

集部

陵川集卷三十一

詳校官中書_臣孫溶

主事_臣呂雲棟覆勘

總校官編修_臣王燕緒

校對官編修_臣汪鏞

謄錄監生_臣陳韶

欽定四庫全書

陵川集卷三十一

述擬

元 郝經 撰

先人初命經為決科文述擬宏詞數十首仍命各依歷
代體制立法措辭謂西漢格高辭約有先秦三代遺風
後世辭章不可及已東漢而下至晉宋六朝漸趨近體
駢儷之作李唐以來對屬切律遂為四六謂之官樣或

為高古以則先漢依放盤詰則以為野而非制故皆模
寫陳爛謹守程式不遺步驟至於作者如韓柳歐蘇亦
不敢自作強勉為之而世謂之畫葫蘆行之千有餘年
弗可改已然而點化詩書六經雜用先秦二漢暢如陸
贄質如吏部富如文饒情如封敖雄如東坡工如彥章
學經作句亦足自為要之典雅古贍情實感激得體而
已故自東漢終於李唐為詔赦制冊檄書露布等述其
事而擬其辭其後專為古文不復記錄近在儀真館與

書狀官荀宗道論次詩文雜著東集追憶得故述擬者
若干首復依世次別為類云

漢淮陽王檄郡國討王莽文

淮陽王更始元年春陵戴侯曾孫玄即皇帝
位光武大破尋邑於昆陽遣將破武關檄諭
天下使共誅莽

漢更始元年月日某官告郡國宗室父老士庶漢德休
明天命未改豈容僭偽久肆叨竊俾我高廟神靈無所

馮依億兆之人遂墜塗炭皇帝陛下以近屬懿親不忍
失職坐視夷滅是用獎率宗盟纂承大統恢復漢室誅
讐討賊今月某日類于上帝通告山川羣神即皇帝位
於涓水之上逆賊王莽椒房餘孽飾詐搆偽夤緣為姦
適漢統之三絕乘四父而輔政言方色厲谿壑深固謙
遜卑讓象恭滔天遂弑孝平皇帝抱負孺子比德周公
號曰安漢其實篡漢既受九錫因稱假攝假而不歸遂
謀即真卒盜有我有漢更建位號改易制度變置名器

顛倒六合翻覆海宇弗寧弗令擾弊民物鋪張妄意潤
色虛文自以為新於是黜奪我大漢諸侯王剪滅劉宗
俾為齊民至於金刀錢文亦不行用我高廟十二室遂
不血食聿至於今奮其威詐逞其暴戾窮兇極惡過於
桀紂乃自以為黃虞復出志欲盈溢高視濶步鄙隘漢
家毒流諸夏禍延蠻貊四海囂然猶未足厭今幾二十
年矣故家遺民無不歌謳思漢矧我宗室之人哉惟我
高皇帝肇造區夏伐秦救民軼於湯武孝惠文景武宣

文治幾於三代鴻恩龐惠暢浹壤膏於肌膚藏於骨髓哀平短祚惡不及民豈令姦偽異姓遂盜有之乎紫色蛙聲餘分閨位秦政楚羽皆為我漢驅除莽又萬一弗逮憑藉外戚恣偽矯誣豈令遂綰皇帝璽稱說天命乎且外戚呂霍上官裨我漢道皆伏其辜豈獨釋莽使遂代漢今漢兵已斬莽將甄阜梁丘賜取宛又敗嚴尤陳茂下昆陽定陵郾又殺王尋王邑破莽兵百萬徇潁川諸郡偏師入武關攻三輔矣羣龍奮迅大人虎變風

蜚雷厲星馳電邁火德炎運有光燭天凡我劉氏及故
臣民宜各率先共雪讐恥誅莽爨社訊清郊廟復爵土
為侯王一如漢制如或尚為逆黨則有常刑如律令

漢昭烈帝討吳孫權檄

獻帝建安二十四年孫權令呂蒙取荊州襲
殺關侯稱臣于操昭烈帝章武元年自率諸
軍伐吳移檄諭權

年月日尚書令某諭孫權及江東將校部曲父老士庶

先王之典負固不服則侵賊賢害民則伐矧于僭竊位
號蔑寡王室屠害方伯黨附叛逆者哉是用興師以致
天罰申明逆順庸示播告夫叛逆之罪小黨逆之罪大
逆而無黨則為惡者孤實繁有徒則為惡者衆故先王
重治賊黨春秋必誅同惡所以湯伐韋顧而夏桀喪齊
桓侵蔡而楚子服我高皇帝虜魏豹以禽項羽光武皇
帝平隗囂而滅公孫皆先治賊黨之義也國家遭陽九
之厄當四百之運漢道弗昌皇綱不振致令羣盜撐裂

於縣曹操父子闕闕神器陛下以帝胄皇孫誕膺天命
龍蟠幽朔蠖屈漢南郁神武應運之姿奮撥亂反正之
志一旅復夏百折興漢天方佑賊用武無所顧惟孫氏
有功漢室破虜則訊清河洛討逆則盪定江東卑之孫
權使誅賊操誰知托國竟匪其人操之陷江陵權遽欲
迎降陛下遣丞相亮諭旨相與拒操遂大破操於赤壁
堅甲利兵盡作灰燼江濤山木總為漢兵權遂不復畏
曹公天下始知有劉氏陛下不矜不伐推功讓能割吳

越以封權奄荆益而復漢操不敢取遂畀之丕孺子童
昏夫豈我敵方為犄角一舉盪平祀漢配天不失舊物
權乃謀為僭竊妄肆姦兇志谿壑之無厭罪丘山而不
顧乃欲如熊繹之陵中國不止子夏之在西河前將軍
督荊州關羽陛下親同骨肉分則君臣有古義士之風
為漢虓虎之將報効而去操所畏敬所當無前權豈能
敵分權江表置關羽荆南身出漢中三道並進相與蹙
操討賊之規也陛下已拓定梁洋進攻關輔羽已威振

許洛懾服河南權祇保據江東不謀進取遂怵陰謀襲殺關羽盜有襄漢奉賊稱臣反為掣肘之仇與作輔車之勢則權復一操漢賊不在丕而在權矣受其王爵南面稱孤忘父兄之忠義陷臣民為逆虜徇江湖之中經營子孫之計一操未已一操復生天下之人不復知有我漢所以必先誅權而後圖丕今陛下舉梁益之衆連交廣之師水陸東下順流揚麾星飛電邁哭羽荆楚尸權秣陵悵張討賊之威益大復讐之義爾皆世服於我

有漢乃二祖之遺民寬仁之所覆育恩澤之所涵浸顧
豈迷復覩面事賊舍衣冠禮樂而斷髮文身以徇蠻夷
之人哉且天道助順不登叛人吳楚之王世為僭偽擯
斥遠外不通中國一時跳踉卒致禽滅故三苗逆命終
於投竄夫差爭長自剄幕下老勦驕恣利刃堪冒苟不
以道江湖之險安足憑恃夫權之姦虐桀猾自視與項
籍王莽子陽輩何如哉卒皆覆亡不暇則天祐我漢高
廟之神靈未艾也今爾有衆為權註誤俾為匪民乃祖

乃父世篤忠貞一時脅從必未丕變陛下總干問罪宜去逆效順倒戈前行共治賊黨并掃偽孽還於舊都大者王小者侯各加賞典如欲與權併命甘為蠻夷逆虜者則有常刑如律令

漢丞相亮諭偽魏檄

安樂公建興十二年丞相亮出斜谷伐魏至郿屯于五丈原檄諭魏丕朝告以討賊之意年月日丞相長史楊儀告魏將佐故漢父老士庶及曹

敵中表族屬蓋聞五帝官天下三王家天下故堯舜與
賢禹湯與子苟無桀紂之惡勦絕基命族屬之微斷祝
嗣續則傳序統體在於一姓其或間甚僥倖必干先王
之誅昔后羿篡於有夏少康以一旅之衆起而殺羿王
莽中絕我漢世祖以十世之裔奮而誅莽殆天未厭有
夏皇漢之德天枝帝胄磐石之宗維持擁衛他姓莫得
而有仁如徐偃賢如齊桓強如楚莊不能易姓改物況
悞淫匪彝豈能盜有之哉是皆天下所共聞古今之大

義也自周室陵夷秦人吞并民受塗炭我高皇帝代虐
以寬易暴以仁除其煩阻置之夷坦受天明命開大漢
萬世無疆之統孝文皇帝繼體守文增修德政恭簡愛
養滋息涵育刑清政簡開大漢萬世無疆之德孝武皇
帝南勦勁越北討強胡東置朝鮮西定西域表章六經
制禮作樂開大漢萬世無疆之業光武皇帝剷除祚穢
子惠謳吟恢復境宇懋建社稷投戈講藝息馬論道開
大漢萬世中興之功則我皇漢基圖鞏固神州中嶽不

拔之宗也。歷世數十載，祀數百本支，繁衍九州四海，盡為劉氏。雖桓靈失馭，漢道中微，第官戚專胡，隳敗王度，非有桀紂自絕之惡也。故天命復集於我先皇帝暨皇帝陛下。國賊曹操螟蛉假姓，贅閭遺孽，自其祖父騰與左珪、徐璜、瀆彖朝憲，父嵩、馮藉饗據台鼎，弱昧漢道，傾覆帝室，職此之由。操尤剽狡，無賴清議，不齒國家之材，授以偏裨，穿窬闕覲，遂領方州。少帝反政，使修郊廟，倒持太阿，放虎自衛。操乃輒行劫遷，重為囚執，逞其梟獍。

之心肆其豺狼之志握皇樞而蹙威柄挾天子以令諸
侯祇將篡竊為謀動以詔旨行事南征北伐抑并屠滅
植根柢于山東置巢穴于鄴下睚眦以肆狼刑戮以立
威弑母后而帝不敢詰殺皇子而帝不敢怨誅鉏豪傑
剪刈人望族九江太守邊讓殺將作大匠孔融及議郎
趙彥撈掠太尉楊彪殺彪子脩至於荀彧許攸崔琰毛
玕皆中朝茂異衣冠領袖或位常伯或參帷幄天子之
昆百寮之師少有抵牾即加刑害毒螫若蛇虺詭秘如

鬼蜮曾繳遍寰宇機穽盈道路自昔人臣不道貪婪嗇鄙狠忍暴戾未有如操之甚者也先皇帝孝景皇帝子中山靖王之後也語宗盟則近於屬籍為尊以仁厚之資挾英雄之氣慨然以復漢自任收攬豪傑從與義烈扶獎王室操尤忌惡必欲誅除託足無所流寓漢南丞相以伊呂之志為顏孟之學才兼管仲知若子房躬耕隴畝不應辟召先帝三顧於草廬之中幡然而起為漢討賊連衡孫權破操赤壁挫其兇鋒折其毒尾於是

敢遂取既為漢賊又為漢臣狐媚梟伏謂天可欺逮其
將死分香析履不及禪代生平姦偽至此盡露逆丕嗣
立公為篡竊父以趙高為桓文子以浞羿為舜禹厭然
自若居之不疑拘執漢帝降削位號大統幾絕先皇帝
遂跨有荆益立漢社稷期於攘除不幸殂落謂丞相才
十倍於丕畀以討賊之事師保陛下拓定中原於是撫
百姓示儀軌開誠心布公道先盡內治次乃外攘曹丕
遽死逆敵復立乃逞童心窮奢極侈至使公卿百官員

土版築竭我漢民膏血以奉偽妄土木丞相痛心疾首
拜表出師義旗一指闕輔響應遂營五大雜耕渭濱非
不能將五諸侯縞衣問罪直入彭城付信一面轉戰出
奇以舉燕趙但以一民莫非漢臣尺地莫非漢土衣冠
右族皆漢庭公卿之子孫畎畝細民皆漢家風俗之涵
養固未忘於祖宗豈遂違其君父是以不忍蹀血以自
相殘按兵觀釁用敦文告故夫曹氏非有高皇帝寬仁
之統也孝文皇帝恭儉之德也孝武皇帝盛大之業也

光武皇帝中興之功也特一時偽定篡竊之賊耳雖據
中原漢有奧主威虐逼窄又有孫氏則其篡竊又不若
莽之強也祖孫一再傳以偽承偽刻薄寡恩禁錮骨肉
勢成孤立彼司馬懿者又一操耳其能久乎與其托於
新造危亡之僭偽醜面同賊曷若臣事二十六葉之大
漢天子歸四百餘年之舊主乎則去就取舍之義昭昭
然無疑矣且昔誅滅祿產迎立代王者平勃之臣也盪
逐尋邑鬻食新莽者南陽之親也洞刺董卓暴尸燃臍

者王允之謀也矧今漢世之危過於二京曹氏之禍甚於莽卓豈無一義士相與誅讐討賊哉丞相肅將天威所嚮克捷宜共合勢摧拉震蕩張大漢之天聲掃偽庭之妖孽奉迎鑾軫還於都邑遂使建興復如建武告於高廟論功行賞在茲舉矣如律令

隋晉王廣滅陳禽陳叔寶露布

文帝開皇九年晉王廣為元帥大舉伐陳獲

陳叔寶露布以聞

臣聞伐罪赦民是謂天討禁暴誅亂乃為義兵所以用
五材而正萬邦奄四海以大一統黃帝戰于涿鹿垂衣
裳以無為大禹征于有苗混車書而致治不享不覲割
據河山稱帝稱王叨竊名器無與覆昏援溺為之推亡
固存紛爭惟日以興禍亂何時而已我國家天開至聖
運啟昌期建皇極於中朝纂天王之正朔復見唐虞之
盛揖遜而興乃有高光之才指揮而定粵惟吳楚實古
荆揚詩人刺為蠻夷春秋貶其僭偽逮孫權三分以自

立暨司馬六代以相傳競尋干戈月一易主殘并骨肉
歲幾弑君血淮海之橫波魚鰕盡赤汚江湖之隙地草
木皆腥莽卓桀驚於門庭曹馬喧呼於傳舍至陳叔寶
尤極惛淫頸瘡猶帶夫藥刀狎客已行其酒令雜選女
御倡和詩篇珥貂蟬者百餘曳綺轂者千數肆為瀆侮
無復君臣歌玉樹之新聲斷金陵之王氣珠壁飾臨春
之閣光耀半天沈檀構結綺之臺香聞數里祠宗廟則
稱疾拜妃妾而臨軒惟侈是崇蔑天弗畏趙高視事於

武帳嫗已畫可於寶牀以江總為臯夔任孔範為伊呂
國益告病民不聊生疎斥忠良賊虐諫輔不止二十罪
殆逾三千條衆叛親離而不知神怒人怨而不恤聽謠
言而弗悟卻畫像而自如謂限南北有長江豈能飛渡
比敗周齊有大福皆使不還方幅員共致於雍熙乃東
南獨阻於聲教爰示禮意反致辱書釁乃自生罪底不
赦授臣以鉞致天之誅總統百萬師徒節制八十總管
過庭而奉承筭畧禡牙而昭告神祇布宣雷霆之威將

率熊羆之士申湯武之仁義蕩桀紂之淫昏東西連衡
首尾並進視風濤如平步卷江山而順流舳艫隱天旌
甲耀日忽龍驤之電邁謂楊素為江神賀若弼出廣陵
韓擒虎濟采石甫航一葦即走萬艘乘大霧而縛醉人
當元日而驚睡主正月某日若弼自北擒虎自南會於
秦淮以取建業前徒倒戈於朱雀後庭指莽於漸臺禽
虎自南掖門入宮若弼自北掖門登殿陳叔寶啼泣掩
袂猶然詩酒興濃倉皇竄身乃謂衣冠道盡落臺城之

翡翠墮辱并之胭脂不啣壁而出降欲下石而始應援
繩引之叔寶與張麗華孔貴嬪同東而上丙戌臣斬張
麗華施文慶沈容卿等以謝三吳執陳叔寶及偽王公
百司擁衛赴闕下掃數十世之偽朝盡為王士合三百
年之異域皆貫諸華荆舒為中國之人江漢被文王之
化此皆皇帝陛下允文允武聖謨洋洋乃聖乃神帝德
蕩蕩是以諸將宣力兆民同仇師不踰時役不更舉會
三光五嶽之氣安九州四海之人宋齊梁陳以來始復

混一夏殷周漢之際今乃比隆臣無任慶快之至謹遣
某官奉露布以聞年月日

唐太宗即皇帝位赦文

門下朕嗣守丕基獲承休緒厲官闡之變故致遐邇之
震驚庸釋羣疑肆行大賚敷於心腹告爾神人昔虐政
之毒流致皇靈之壅底朕從太上皇帝糾昌義舉獎率
宗盟稱無辜而籲天為有衆以請命下河東之甲孤隋
自斃於維揚翔霸上之師偽政行平於伊洛化家為國

代虐以寬遂統承於先王乃撫治於方夏維爾萬姓甫
出阤危肆予一人退守藩服執臣子之節推尊榮於父
兄持恭遜之心全始終於孝悌孰意天未厭亂時弗底
寧締構姦兇蘊隆讐敵變起蕭牆之內禍生骨肉之間
力百戰以方成忿一舉而自棄社稷大計須行管蔡之
誅宗廟再安遽有唐虞之禪讓焉弗允退亦無從仰順
宸慈肆登大寶處兆人之上可無及天下之恩得四海
之歡庶幾盡天下之養可大赦天下

云

云

於戲遭家不

金史卷三十一
造幸免於覆亡繼志無能豈堪乎授受施大易雷雨之
澤始潤瘡痍負春秋肆眚之譏重增祗慄無稔怙終之
惡遂生僥倖之心各去舊污共成新化咨爾有衆體予
至懷

太宗伐高麗班師詔

貞觀十九年上親征遼東不能成功深惜之
十月癸未敕班師

制曰止戈為武佳兵不祥爰有弗享則征殆非得已而

用叛而伐服而舍是謂德攻忘則危好則亡時乃大訓
朕自削平四海奄有多方施教化而不復言兵制禮樂
而惟期于治祇務修文偃武庶幾保大定功裔夷高句
麗遠負海隅自謂日影怙恃河伯之勢矯誣箕子之功
謂隋三往而竟亡夫誰萬里而更舉敢行威虐公肆馮
陵格文祖而苗民弗庭會塗山而防風不至朕膺傳禪
姑示涵容乃拒璽書愈失藩禮至蓋蕪文弑君以逞以
莫離支專國而驕連結民夷侵擾遼右蕩搖我疆場疎

動我諸華命將致討而弗悛致朕親行而問罪舉泰山而壓卵彼惡敢當傾滄海以沃焦則莫我遏奪命而浪走絕島棄城而空濶無人兵刃莫支其鋒將士咸賈其勇蠢茲小虜敢怒大邦不足辱於王師姑增修於德政諸軍可即日發還嗚呼聖有謨訓鬼方反憊于殷宗悔其可追輪臺漫勞於漢帝勝之不武祇以為勤不能自克而遂非以致貪功而過舉違大臣之強諫蹈亡國之覆車越朕之愆式愧爾衆布告遐邇咸使聞知

贈魏徵司空制

貞觀十七年徵薨贈司空諡曰文貞給羽葆鼓吹陪葬昭陵

制曰古有社稷之臣力行而濟天下以道為朕帷幄之佐強諫而格君心之非方垂拱以仰成遽彌留而不起宜崇優數用卹忠勤故特進侍中知門下省事兼太子太傅鄭國公魏徵中誠積真仁義立德以坤之直方大用乾之純粹精不二三以釋君篤忠貞而事主恥朕不

及堯舜作佐時之臯陶致朕必如成康為制禮之姬旦
每進藥石輒中膏肓有政事之或遺而諫章則即至爰
自言職遂踐台司施教化者四年俾風俗如三代奪去
之遽天不憖遺忽廟堂之遂空何斯人之不幸雖臨小
斂忍視大還追登平土之司以為下泉之賜庶幾英爽
服我寵休嗚呼在亂臣則十人共期予治亡正身之一
鑑誰弼予違中流而虞風波未濟而失舟楫興言不已
涕泗徒零可特贈司空

云

宋璟右丞相制

玄宗開元十七年以璟為尚書右丞相

制曰共政必圖舊人以篤儀刑之典格君尤賴莊士式
資匡直之忠重德佐王則朝廷尊元老在位則社稷固
乃眷耆英之宰宜升上相之崇黃門監同平章事開府
儀同三司致仕廣平郡公宋璟弘毅而明靜肅而勇堅
如鐵石凜若冰霜不阿不撓而行以方至大至剛而養
以直盡心強諫獨配魏徵之忠良正色立朝復見汲黯

之風采夷險一節寅亮三朝共倚賴于袁安匪中庸之
胡廣佑我先后相予冲人既撥亂以有為以中興而自
任草去神龍之弊追還貞觀之隆厚風俗而振紀綱肅
典憲而抑僥倖格天大畧非一旦之救時經國遠圖舉
萬代之長策抗章而去成功弗居宜正位于中台復登
庸于右弼變和四海表正百寮於戲股肱之寄久已倚
毗體貌之餘敢忘尊禮方詢咨於黃髮以允慰于蒼生
懋建大猷圖惟極治茲朕無斁時乃之休可特授右丞

相

云

贈張巡揚州大都督制

至德二載冬十月睢陽陷巡遠死之十二月

上御丹鳳樓赦天下贈巡遠等官

勅執干戈以衛社稷焉得勿殤聞鼓鼙則思將臣況於
死節挺英靈而不散凜烈氣以如生重為褒崇庶慰精
爽故御史大夫河南節度副使張巡慷慨立志突兀効
忠開誠心而待人委軀命以徇義苟不以道甘餓西山

胡能詭隨欲蹈東海屬逆胡之荏惡熾兇焰以燎天從
與興師倉皇討賊聲淚俱發而誓衆邀截不暇以乘城
戰百合而氣益振馘萬計而賊乃沮料敵應變出奇無
窮屹承天之不周歸中流之底柱牽制醜虜絆一孤墉
遮蔽江淮全半天下走令狐而矢盡眇子奇而事危罵
賊而嚼齒空齧乏食而殺妾饗士援絕乃陷不復求生
力竭被禽付之以死無負國而奚憾得其所則為榮嗚
呼大節凜千古實罕見精忠貫日今孰可侔實祖宗之

神靈乃國家之元氣有士若此賊不足平無爵以稱人
何以勸巡可特贈揚州大都督其守許遠功與巡同可
特贈荊州大都督其將南霽雲義烈尤著可特贈開府
儀同三司訪求其子孫各加官爵皆立廟睢陽歲時致
祭主者施行

郭子儀賜號尚父制

建中元年德宗嗣位詔攝冢宰賜號尚父

制曰朕以眇德獲荷丕基諒陰之中方恭默以思道嗣

服之始惟垂拱而仰成茲既太公之在朝尚何傳說之
求野宜進異號以崇元勲中書令天下兵馬副元帥汾
陽王郭子儀華嶽炳靈金天傑氣純誠惟一忠勇俱全
沈雄而畧包河山高明而精貫日月早識兵勢嘗甲武
科屬孽胡之憑陵致中原之板蕩舉燕趙而擣巢窟復
雍豫而清京都保乂皇家殄殲逆虜功愈大而心愈小
事益殷而謀益深乃師中之大人實天下之大老方叔
克壯佐周室之中興孔明勤勞期漢家之恢復單騎見

虜壓之以誠孤軍逐戎勝之以義於古人則未有固當
世之罕儔羽翼四朝用舍一節存億萬衆之性命繫三
十年之安危雖位中台久疏王爵琢金石而許宥十世
逮子孫而進用數人賞不酬勞名未稱德宜俾兼于元
宰仍錫號為父師於戲富貴著社稷之功始終乃人臣
之道范蠡泛舟而去豈曰見幾子房辟穀為辭亦未盡
善豈如今日之繾綣而無曩時之猜嫌極其尊榮永俾
稱頌敬服朕命其代予言可令攝冢宰賜號尚父云

云

贈韓愈禮部尚書制

穆宗長慶四年愈卒贈禮部尚書諡曰文

制曰道復有統乃為百世之師天不憖遺孰謂九原可
作梁木壞而復將安放衮衣斂而庶以為榮故吏部侍
郎韓愈執德不回以道自任幾聖未達於一間大儒兼
綜於四科傳仲尼心若顏淵曾參之親矣述孟軻志謂
荀況揚雄為未醇明白而皆仁義之歸與衍而得性命
之正完三光五嶽之氣浩然而獨存承八代百家之微

嶷若而自振力闢二氏申明六經去陳言而新斯文距
邪說而立名教巍巍乎泰山北斗玉潔石光浩浩乎長
江大河龍翻鳳躍置之朝廷之上而不喜斥之嶺海之
外而不憂六軍無譁踰月而清輦轂萬刃注視片言而
折兇鋒以有用之才明佐王之道直造先秦之上豈惟
由漢以來於戲才難其然間生乃爾子房而下有賈誼
卒棄於文景之隆孔明之後生王通不與夫堯舜之運
今甫中壽遽即大還為邦竟無百年致治豈能三代爰

申遺恨進長儀曹庶幾幽冥之中不忘制作之意咨爾
精爽服予寵休可持贈禮部尚書

云

追復李德裕太子少保衛國公制

宣宗大中元年貶德裕崖州司戶卒懿宗咸
通九年追復太子少保衛國公

制曰朕祇遵先烈爰念英賢每待旦以旁求嘗當饋而
屢歎眷惟會昌之政實賴社稷之臣厥德不回運乃逢
於千載於今為庶道終否於九原盡焉傷心何以為訓

故太尉同平章事兼太子少保衛國公東都留守貶崖
州司戶叅軍李德裕弘毅軼世挺特邁倫廓達而無町
畦明辨而有風采淵源問學滔滔不窮議論辭章滾滾
可喜以興起斯文自任以經濟天下自為入掌絲綸則
高文大冊動觀聽出為牧伯則深謀遠畧服荒遐踐
台司獨專大柄信任之重古今所無政如昭烈之孔明
又甚高宗之傳說當國一相輔政六年威令幾如元和
削平藩鎮風俗頓還三代罷絀僧尼雖逢不世出之君

幸得大有為之佐至先朝遽褫官而退乃權臣快私忿而行湮沈海島之中淪棄煙瘴之表兆民謗讟四海訟冤天亦致傷朕胡能忍嗚呼豈意姦邪之黨復見於今乃令忠直之賢啣恨而死不為昭雪以謝衣冠永使沈冥終負義烈可追復太子少保衛國公依禮改葬主者施行

李克用破黃巢露布

僖宗中和三年雁門節度使李克用為京城

東北面行營都統破黃巢遂復京師

尚書兵部臣聞兵以禁暴王者所以行天誅德在除殘
聖人所以運神武故草竊姦宄之構亂非芟夷蘊崇而
莫寧惡不去則善何以信伐不張而政何以舉霜露既
降乃成亭育之功陰沴盡消方定高明之位我國家基
圖鞏固德澤汪洋高祖太宗除隋亂而軌湯武高宗玄
宗致唐治而肩成康植茲鴻休畀我列聖陛下誕膺明
命紹復先王憲章以承天心勵精而張治具十八葉太

平天子德本好生三百年有道邦家仁而不殺孰謂亂
生於治遂令安底於危逆賊黃巢器實顓庸資乃樂禍
會稜氛以為氣包蛇虺以為心初無偷劫之謀豈有帝
王之意乘仙芝之鼠竊聚亡命以蝟興始則距躍於河
南終乃翻騰於嶺外蜂蜚吳楚蟻結江淮高駢玩寇而
不追王鐸畏寇而不戰或嬰城而固守或擁兵以窺窬
遂致姦兇恣行亂畧鴟張而無所忌憚豕突而莫敢誰
何郡國以之丘墟京師因而覆沒謂已有命乃啟異謀

奸踰王鈇稱建偽號諸陵之祀可勝抔王之悲萬乘蒙
塵莫雪終天之痛雖神人之共怒而禍亂則方殷猘猢
血世以無厭豺狼肉人而不置臣克用繆膺旌節遠在
邊陲父子俱受國恩君臣敢忘大義不能先事入衛曲
突徙薪固當投袂即行焦頭爛額乃揮淚而為禡遂歆
血以成盟掃部內以興師指天心而誓衆下兵嵐石建
旆夏陽義聲振而軍聲揚賊氣沮而士氣倍彼謂鴉兵
已至褫魄喪心我知龍運方興賈勇儲銳乃屯沙苑以

告師期進及乾坑便禽賊將二月某日遂合臣重榮臣處存等兵與巢及其將王璠林言趙璋尚讓大戰梁田師直為壯天棐惟譙雷萬鼓而一炮震三川而皆沸馬逸不止而橫驚衆怒欲洩而長驅激土雨以奮威彗霜鋒而合勢營頭壓陣二百萬賊衆皆奔積屍橫空三十里僵胔不斷雖已奪氣尚殲游魂襲其餘師再戰于零口邀其奔路先搃於藍田彼猶釜中之魚乃作几上之肉四月某日進臨京雉直繫渭橋我七戰而七禽彼一

遇則一敗乘勝以奮勢破竹以無前遂北而攻快建瓴而孰禦越某日入自光泰門挺身決戰先衆摧鋒呼聲動天殺氣蔽日彼則建輪擁盾柵巷而排牆我乃投刃揮戈執俘而斬賊由東內及於西內自外城入於子城居人擲瓦石以助威偽官裂冠裳而請命萬騎一蹙百道並攻賊窘相擊人自為戰蕩蜚血於魅穴薄死骨於狸丘蹂賊於望春官庭蹴賊於昇陽殿圍賊乃大潰崩於鉅鹿之沙彼惡敢當碎甚長平之瓦首尾俱斷羽翼

皆殘鳥駭而衝獸窮則躩叱魯陽之日鬪又踰時見鄢
陵之星戰猶未已巢乃乘其暮夜奪命遁逃其衆已燔
雖貸息其何濟分師捕討旋授首則有期臣竊念此兇
渠禍踰往昔熾甚樊崇張角慘於朱泚祿山幾頓我皇
綱敢窺吾神器蓋皇天所以申警於陛下使陛下以之
寅畏於皇天開萬世無疆之休啟一日中興之運臣今
肅清禁署灑掃神京宸極巍巍罷狐鳴而梟噪雄都業
業復虎踞以龍蟠伏念臣本裔夷生於沙漠非良平智

謀之士乃統戎行無信布爪牙之材亦承鈇鉞元兇遂
殄罪劣何能此皆皇帝陛下德並乾坤明侔日月蘊英
圖於殼內騁大造於區中以撥亂之才施致平之畧委
任不僭授受是宜兆人所以傾心諸將為之宣力日出
而羣陰伏盜竊發以何為聖作而萬國寧兵一試而即
已橐弓却馬挈黎庶于雍熙端委垂衣躋瘡痍于仁壽
延我唐祚過彼周期臣無任慶快之至謹遣某奉露布
以聞

諸鎮討朱全忠檄

哀帝天祐四年蜀王王建岐王李茂貞約晉
王克用共討梁克用乃傳檄諸鎮告以討梁
之意

天祐四年夏四月晉王克用致告諸鎮諸侯王及偽梁
臣僚蓋聞田橫列國之壯士恥臣漢而竟不西朝魯連
縫掖之書生聞帝秦而欲蹈東海蓋義烈著于平昔而
死生為之不踰昭昭在天矯矯貫日亂臣賊子所不敢

肆微君弱國賴之以存粵惟皇唐奄有四海踰二十帝
幾三百年雖紀綱寢以陵夷而德澤尚為龐厚鼎未可
以問其輕重厯惡得而窺其短長故朱泚祿山肆其姦
兇而遂以殄滅黃巢尚讓張其盜竊而繼即誅夷緬維
人心灼見天意僞梁朱全忠資尤兇悍內實姦雄初以
碭山之一夫亡入冤胸之羣盜負跳踉之劇氣稱庸狡
之謏材遂覆京師以毒海內知賊必敗乃謀自歸斂羽
戢毛以待風颭之會瞑目弭耳長懷蛇虺之心國家推

寬大之恩致懷柔之道賜之旄節適為養惡之謀分以
土田祇作資賊之計既蒙優渥乃寢騫騰伐叛捕亡收
貳以為己邑厲兵秣馬假義而逞異圖遂踐台司益封
王爵閼閹日切意望彌深乃納交于朝權叨求天寵又
激怒于隣壤締起兵端遂連十萬之師并有四鎮之地
國賊崔杼知賊焰之方熾甚王室之甚微賣鼎命以外
交持天權而內劫全忠益自恣肆無所憚違中潛犄角
之機遙作輔車之勢力制中外威臨遐邇肩以為官官

天子之腹心非盡去而國不我得百官天子之輔翼非
易置而權不我歸全忠乃效董卓之尤興晉陽之甲京
師因而覆沒乘輿以之播遷進逼鳳翔乃犯行在矢及
君屋血濺御衣兇鋒肆以無前毒尾搖而益怒侯景渡
江而指闕梁帝倉皇晉師遷墓以成圍曹人兇懼乃抄
餽餉而遏惟蘓天子併日而食後宮析骸以爨主父親
探子雀戲楚王安復得乎熊蹯言之傷心痛如疾首不
能岐託終入梁亡全忠乃泣下沾襟徒行執轡奉龍顏

而効順極狐媚以欺人急於攘竊之私乃定劫遷之計
挈萬乘而不置挾孤注以遂東殺戮諸王賊虐宰輔惡
其名士投畀濁流文物為之一空衣冠為之掃地乃蜚
血于禁禦而薄肉于宮闈天子涕泣求生哀矜請命社
稷已非唐有左右罔匪梁人雖李氏之天王實朱家之
日月甘行禪讓冀免誅夷懼人望之不除竟椒蘭而行
弑大肆殺戮恣為矯誣戕成濟而貸賈充釋羽父而討
為氏大器既以入手藥運遂乃應天賊母后以示威立

幼君而資篡卒移皇祚構建偽朝以鄙吝之材蹈崇高之位恃已有命謂秦無人逞其梟獍之心行夫狗彘之行姦子婦而自肆淫臣家而不歸污穢我皇綱褻瀆吾神器如此不道自昔罕聞禍絕三綱罪踰九法人神之所共怒天地之所不容惟爾多方乃祖乃父世惟唐臣有社有人豈非唐祚可坐視而不救乃偷生而自營不共討平有醜面目彼既盡其東畧必又肆其西封雖欲不危其可得已今孤以沙陀之騎契丹之甲建旗麾而

出漠北聲金鼓而下河東瞰臨黃流直抵白馬背引趙
魏橫約青齊東西連衡首尾並進岐王則卷三輔而直
擣下二川而旁馳蜀王則舉梁益之衆出江陵楚王則
會荆襄之師渡漢沔吳王則跨連淮海蟠亘東南厲三
吳之鋒進圍濠泗淬兩淮之銳直壓汴梁梟賊首而剖
逆心祭先皇帝掃寇穴而削偽號復唐乾坤立宜曰於
宗周奉世祖而歸漢其為梁臣人比及師臨有能斬全
忠首者王得其支者公侯舉郡國降者超遷仍赦附叛

逆之罪急急如律令

陵川集卷三十一